

08/08/1998

Banteras rasuah di semua peringkat

Mohamad Farid

APABILA kita sebut perbuatan yang keji, maka teringatlah kita perbuatan menagih dadah, pembunuhan kejam (dengan mengerat anggota badan) atau perbuatan seumpama dengannya. Tetapi kita tidak terfikir mengenai rasuah yang juga mengaitkan dengan perbuatan keji.

Ada kalangan kita sendiri yang masih tidak tahu dan tidak dapat membezakan yang mana satu, perkara yang keji atau sebaliknya. Perkara yang halal dan haram. Perkara yang dilarang atau dituntut oleh agama.

Maka berlakulah perbuatan seperti rasuah. Pada masa yang sama, kita tidak menafikan ada di antara mereka yang sudah mengetahuinya tetapi buat-buat tidak tahu, ataupun 'tutup sebelah mata'.

Demi mendapat segala pangkat, kekuasaan dan pengaruh, taktik kotor dilakukan, rasuah diamalkan, teori Machievilli dipraktikkan.

Mungkin teori Machievilli yang berbunyi "matlamat menghalalkan cara" menjadi sumber rujukan sekali gus menafikan sumber rujukan al-Quran dan al-hadis itu sendiri, bagi yang beragama Islam dan kitab agama lain bagi penganut agama lain.

Selain Islam, semua agama mengharamkan rasuah kecuali Yahudi melalui kitabnya-Talmud.

Hukum agama mereka tunggang terbalik, yang haram dihalalkan, nasihat ulama diketepikan. Itulah yang kita takutkan.

Rasuah ertinya mengambil segala keperluan dan kemahuan orang yang bukan haknya. Dia tidak kira asalkan perutnya kenyang, poketnya penuh dengan wang.

Maksudnya, sesuatu perkara yang sepatutnya menjadi hak A, tetapi B yang mendapatnya. Hak A dinafikan. Bererti, berlakunya rasuah menyebabkan hak seseorang yang berhak itu dinafikan.

Di dalam al-Quran dan Hadis (maksudnya) ada menyebut dengan tegas mengenai perbuatan rasuah ini.

"Dan kamu akan melihat kebanyakan dari mereka (orang-orang Yahudi) bersegera melakukan dosa, permusuhan dan memakan yang haram. Sesungguhnya amat buruk apa yang mereka kerjakan." (Al-Maidah : 62)

"Allah mengutuk perasuah, orang yang menerima rasuah dan perantara rasuah antara keduanya." (Ath Thibrani dan Rabi')

"Semua daging yang tumbuh atas tubuh hasil memakan makanan haram tidak ada benda yang lebih mustahak dijilat dia melainkan api neraka".

"Dan janganlah sebahagian kamu memakan harta sebahagian yang lain di antara kamu dengan jalan yang bathil dan janganlah kamu membawa (urusan) harta itu kepada hakim-hakim, supaya kamu dapat memakan sebahagian daripada harta benda orang lain itu dengan jalan berbuat dosa, padahal kamu mengetahuinya." (Al-Baqarah : 188)

Menyedari betapa seirasnya kesan gejala rasuah terhadap masyarakat dan negara, kerajaan dan Badan Pencegah Rasuah (BPR) semakin serius menanganinya. Tahniah dan syabas diucapkan.

Penguatkuasaan undang-undang dan siasatan harus dilakukan dari semasa ke semasa. Dari peringkat bawahan hinggalah atasan. Dari peringkat 'pengikut' hinggalah pemimpin. Tidak ada sesiapa pun terkecuali.

Sebagaimana Perdana Menteri Datuk Seri Dr Mahathir Mohamad sendiri yang menyatakan sesiapa saja melakukan rasuah pasti dihukum tanpa mengira kedudukan.

Kita tidak mahu 'ikan bilis' yang melakukan perbuatan ini ditangkap tetapi 'jerung besar' yang berkeliaran terlepas dan mereka inilah yang

akan memakan ikan kecil lain.